

- Jam, pelagus, sentis operosa negotia gentis,
 Et mala damna minus metuis tibi, nautica pinus.
 Nec mulcet Tracum volucrem nisi tempus opacum:
- 95 Partes longinquas, hieme concesserat in quas,
 Mutat, eas iterum petitura, falanx acierum.
 Pleps aciem servat, neque se nisi rite catervat,
 Jocunde castra disponens ipsa sub astra.
 Deditus hic somnis non est exercitus omnis,
- 100 Partibus ignarum non est opus excubiarum:
 Aere sub nudo vigilum sacra sollicitudo
 Gentem custodit, et voce pericula prodit.
 Candida venit avis, animalibus emula pravis,
 Quam longo rostro veri dedit Affrica nostro.
- 105 Ver solet afferre volucres é viscere terre,
 Quas hieme tota victus ratione remota,
 Quis genius fovit, mater Proserpina novit.
 Nam propriis aditis manet invisus puer Itis,
 Quem mater dira stupri mactavit in ira,
- 110 Qui nisi sit cesus, et ni sit turpiter esus,
 Murmure facundo non obvolitabit hirundo.
 Si non uxori pateant illata sorori,
 Incertum plane cantabit laudula mane.
 Sola dat Alcione rara fetum ratione:
- 115 Denique non tepidum suspendit ab arbore nidum,
 Nec solet in vere vel ad austros ova fovere,
 Sed cum supremo magis alget in ethere temo,
 Ova jacit cruda pelagi statione sub uda:
 Vix aliqua parte propria fulcitur ab arte.
- 120 Quantum preclare nosti, Natura, juvare,
 Salva sit ut soboles, ad vernos edita soles.
 Sidera nam pacas, ventos, auras, mare placas,
 Et facis intenta teneris pullis elementa:
 Fetus vitales nova donec hauriat ales,
- 125 Nequaquam bella pelagi ciet atra procella.
 Hec equidem cautis res est notissima nautis,
 Qui propriis rebus famulantur in hisce diebus,
 Ut que proveniant tute commercia fiant.
 Vox mea, succumbis, si nidificare columbis
- 130 Turturibusque velis: data gens est illa querelis,
 Nec dum letatur, gemitu caruisse putatur.
 Dat fetus auca, dat anas, gallinaque rauca.
 Pendulus est asser, petit unde cubilia passer.
 Inplet cornicum totum gens emula vicum,
- 135 Gaudet porrectis numerosa monedula tectis.
 Corvus vere novo maturior insidet ovo: